

ACUNGA NATAL QUI NÔS JÁ SUNHÁ

Más unga natal já chegá
Co luz di esperánça luminado.
Alma cristám ánsia olá
Minino na pisépio sagrado.

Jesus, nôsso Rê, têm ali,
Pronto pa alegrá coraçám.
Quim divera crê, lô pedí
Graça pa achá salvaçám.

Natal sã image di amôr,
Sã hino di paz, alegria
Pa gente co grândi fervôr,
Têm fé na Jesus co Maria.

Vôs têm fé? Vôs têm humildádi?
Têm vontádi di emendá?
Mas quí sã somente bondádi,
Jesus certo lô querê olá.

Paz pa nôs Jesus vêm trazê
Co tudo amôr na coraçám.
Ele sabe qui lô sofrê
Pra mor di nosso salvaçám.

*

Unga anôte nôs já sunhá
Co Natal divera galánti.
Na vida, nôs nunca si olá
Beléza assi grândi na diánti!

Que lora sunhá, nôs j'olá
Unga istréla vivo, briliánte,
Decido di Céu, ta balá,
Banhado pa luz istonteánte.

Qui di gente sai vêm janela,
Qui di gente vai rua andá,
Seguí trás d`acunga istréla
Qui ta nom-têm fim di briliá.

Di-repente, istrélapará
Na riva di mato di Guia.
Tudo ergui ôlo, já olá
Rosto celestial di Maria.

Qui image difícil di crê
Qui nosso ôlo pecador,
Na ora qui nádi isquecê,
Já olá co grândi fervôr.

Quim nádi ficá boca-aberto
Diánte di seléa beléza?
Rosto amoroso vêm perto...
Na roda, tudo sã puréza.

Co ôlo dilágrí mulado,
Mai di Jesus sai voz falá:
«Uví, chám quirido, abençoado,
lou tamêm triste, ta churá,
Olá assi grándi margura
Na assi tanto alma cristám!»
Su voz, co suávi tènura,
Sã pa consolá, coraçám.

«Masquí triste, lou têm aqui
Co filo di Dios na lado.
Quim humilde, sabe pedí,
Nádi chegá fim dizolado.
Si Dios têm na nómi di vós,
Vós lô têm na Su coraçâm.
Rezá, lembrá sempri di Nôs
Co amôr, co fé, co devoçám! »

Greza, sino ta rapiçá,
Fazê nôs di sono erguí.
Missa-galo ta começá,
Nôs azinha já vai uví.

Jesus, co amôr divinal,
Ta durmí na palha sagrado...
Su Mai fazê nôsso Natal
Más bunito, más alegrado.

(Dizémbro di 1988)